


ਸਰੋਤ ਪੰਨਾ ੧

ਪੰਨਾ ੧



तमसो मा ज्योतिर्गमय

SANTINIKETAN
VISWA BHARATI
LIBRARY

T₂
38


243633



কালের যাত্রা

কালের যাত্রা

রবীন্দ্রনাথ ঠাকুর



বিশ্বভারতী গ্রন্থনবিভাগ
কলিকাতা

প্রকাশ ভাদ্র ১৩৩২

পুনর্মুদ্রণ আষাঢ় ১৩৫০, আষাঢ় ১৩৫৬, কার্তিক ১৩৬৭, ভাদ্র ১৩৭৩

পরিবর্ধিত সংস্করণ বৈশাখ ১৩৭৮ : ১৮২৩ শক

© বিশ্বভারতী ১২৭১

উৎসর্গ

শ্রীযুক্ত শরৎচন্দ্র চট্টোপাধ্যায়ের
৫৭ বছর বয়সের জন্মোৎসব উপলক্ষে
কবির সন্মোহ উপহার

৩১ ভাদ্র ১৩৩২

	ପୃଷ୍ଠା
ରଥେର ରାଶି	୯
କବିର ଦୀକ୍ଷା	୪୯
ପରିଶିଷ୍ଟ : ରଥଯାତ୍ରା	୧୧
ଗ୍ରନ୍ଥପରିଚୟ	୪୯

রথের রশি

রথযাত্রার মেলায় মেয়েরা

প্রথমা

এবার কী হল, ভাই !
উঠেছি কোন্ ভোরে, তখন কাক ডাকে নি ।
কঙ্কালিতলার দিঘিতে ছুটো ডুব দিয়েই
ছুটে এলুম রথ দেখতে, বেলা হয়ে গেল ;
রথের নেই দেখা । চাকার নেই শব্দ ।

দ্বিতীয়া

চারি দিকে সব যেন থম্‌থমে হয়ে আছে,
ছম্‌ছম্‌ করছে গা ।

তৃতীয়া

দোকানি-পসারিরা চুপচাপ বসে,
কেনাবেচা বন্ধ । রাস্তার ধারে ধারে
লোক জটলা করে তাকিয়ে আছে
কখন আসবে রথ । যেন আশা ছেড়ে দিয়েছে ।

প্রথমা

দেশের লোকের প্রথম যাত্রার দিন আজ ;

বেরবেন ব্রাহ্মণঠাকুর শিষ্য নিয়ে —
 বেরবেন রাজা, পিছনে চলবে সৈন্যসামন্ত—
 পশুিতমশায় বেরবেন, ছাত্ররা চলবে পুঁথিপত্র হাতে ।
 কোলের ছেলে নিয়ে মেয়েরা বেরবে,
 ছেলেদের হবে প্রথম শুভযাত্রা—
 কিন্তু কেন সব গেল হঠাৎ থেমে ।

দ্বিতীয়া

ঐ দেখ, পুরুতঠাকুর বিড়্‌বিড়্‌ করছে ওখানে ।
 মহাকালের পাণ্ডা ব'সে মাথায় হাত দিয়ে ।

সন্ন্যাসীর প্রবেশ

সন্ন্যাসী

সর্বনাশ এল ।
 বাধবে যুদ্ধ, জ্বলবে আগুন, লাগবে মারী,
 ধরণী হবে বক্ষ্যা, জ্বল যাবে শুকিয়ে ।

প্রথম

এ কী অকল্যাণের কথা ঠাকুর !
 উৎসবে এসেছি মহাকালের মন্দিরে—
 আজ রথযাত্রার দিন ।

সন্ন্যাসী

দেখতে পাচ্ছ না— আজ ধনীর আছে ধন,
 তার মূল্য গেছে ফাঁক হয়ে গজভুক্ত কপিথের মতো ।

ভরা ফসলের খেতে বাসা করেছে উপবাস ।
 যক্ষরাজ স্বয়ং তার ভাণ্ডারে বসেছে প্রায়োপবেশনে ।
 দেখতে পাচ্ছ না—লক্ষ্মীর ভাণ্ড আজ শতছিদ্র,
 তাঁর প্রসাদধারা শুষ্ক নিচ্ছে মরুভূমিতে—
 ফলছে না কোনো ফল !

তৃতীয়া

হাঁ ঠাকুর, তাই তো দেখি ।

সন্ন্যাসী

তোমরা কেবলি করেছ ঋণ,
 কিছুই কর নি শোধ,
 দেউলে করে দিয়েছ যুগের বিত্ত ।
 তাই নড়ে না আজ আর রথ—
 ঐ-যে, পথের বুক জুড়ে পড়ে আছে তার অসাড় দড়িটা ।

প্রথমা

তাই তো, বাপ্ রে, গা শিউরে ওঠে—
 এ-যে অজগর সাপ, খেয়ে খেয়ে মোটা হয়ে আর নড়ে না ।

সন্ন্যাসী

ঐ তো রথের দড়ি, যত চলে না ততই জড়ায় ।
 যখন চলে, দেয় মুক্তি ।

দ্বিতীয়া

বুঝেছি আমাদের পুঞ্জো নেবেন ব'লে

হতে দিয়ে পড়ে আছেন দড়ি-দেবতা ।

পুজো পেলেই হবেন তুষ্ট ।

দ্বিতীয়া

ও ভাই, পুজো তো আনি নি । ভুল হয়েছে ।

তৃতীয়া

পুজোর কথা তো ছিল না—

ভেবেছিলেম রথের মেলায় কেবল বৈচব কিনব,

বাজি দেখব জাতুকরের,

আর দেখব বাঁদর-নাচ ।

চল-না শিগগির, এখনো সময় আছে,

আনিগে পুজো ।

[সকলের প্রস্থান

নাগরিকদের প্রবেশ

প্রথম নাগরিক

দেখ্ দেখ্ রে, রথের দড়িটা কেমন করে পড়ে আছে ।

যুগযুগান্তরের দড়ি, দেশদেশান্তরের হাত পড়েছে ঐ দড়িতে,

আজ অনড় হয়ে মাটি কামড়ে আছে

সর্বাঙ্গ কালো করে ।

দ্বিতীয় নাগরিক

ভয় লাগছে রে । সরে দাঁড়া, সরে দাঁড়া ।

মনে হচ্ছে ওটা এখনি ধরবে ফণা, মারবে ছোবল ।

তৃতীয় নাগরিক

একটু একটু নড়ছে যেন রে । আঁকুবাকু করছে বুঝি ।

প্রথম নাগরিক

বলিস্‌ নে অমন কথা । মুখে আনতে নেই ।

ও যদি আপনি নড়ে তা হলে কি আর রক্ষে আছে ।

তৃতীয় নাগরিক

তা হলে ওর নাড়া খেয়ে সংসারের সব জোড়গুলো
বিজোড় হয়ে পড়বে । আমরা যদি না চালাই—
ও যদি আপনি চলে, তা হলে পড়ব যে চাকার তলায় ।

প্রথম নাগরিক

ঐ দেখ্‌ ভাই, পুরুতের গেছে মুখ শুকিয়ে,
কোণে বসে বসে পড়ছে মস্তুর ।

দ্বিতীয় নাগরিক

সেদিন নেই রে
যেদিন পুরুতের মস্তুর-পড়া হাতের টানে চলত রথ ।
ওরা ছিল কালের প্রথম বাহন ।

তৃতীয় নাগরিক

তবু আজ ভোরবেলা দেখি ঠাকুর লেগেছেন টান দিতে—
কিন্তু একেবারেই উল্টো দিকে, পিছনের পথে ।

প্রথম নাগরিক

সেটাই তো ঠিক পথ, পবিত্র পথ, আদি পথ ।

সেই পথ থেকে দূরে এসেই তো কালের মাথার ঠিক থাকছে না ।

দ্বিতীয় নাগরিক

মস্ত পণ্ডিত হয়ে উঠলি দেখি ! এত কথা শিখলি কোথা ।

প্রথম নাগরিক

ঐ পণ্ডিতেরই কাছে । তাঁরা বলেন—

মহাকালের নিজের নাড়ীর টান পিছনের দিকে,

পাঁচজনের দড়ির টানে অগত্যা চলেন সামনে ।

নইলে তিনি পিছু হটতে হটতে একেবারে পৌঁছতেন

অনাদি কালের অতল গহবরে ।

তৃতীয় নাগরিক

ঐ রশিটার দিকে চাইতে ভয় করে ।

ওটা যেন যুগান্তের নাড়ী—

সান্নিপাতিক জ্বরে আজ দব্, দব্, করছে ।

সন্ন্যাসীর প্রবেশ

সন্ন্যাসী

সর্বনাশ এল ।

গুরুগুরু শব্দ মাটির নীচে ।

ভূমিকম্পের জন্ম হচ্ছে ।

গুহার মধ্য থেকে আগুন লকলক্ মেলছ রসনা ।
পূর্বে পশ্চিমে আকাশ হয়েছে রক্তবর্ণ ।
প্রলয়দীপ্তির আংটি পরেছে দিক্চক্রবাল ।

[গ্রহান

প্রথম নাগরিক

দেশে পুণ্যাত্মা কেউ নেই কি আজ ।
ধরুক-না এসে দড়িটা ।

দ্বিতীয় নাগরিক

এক-একটি পুণ্যাত্মাকে খুঁজে বের করতেই
এক-এক যুগ যায় বয়ে—
ততক্ষণ পাপাত্মাদের হবে কী দশা ।

তৃতীয় নাগরিক

পাপাত্মাদের কী হবে তা নিয়ে ভগবানের মাথাব্যথা নেই ।

দ্বিতীয় নাগরিক

সে কী কথা । সংসার তো পাপাত্মাদের নিয়েই ।
তারা না থাকলে তো লোকনাথের রাজত্ব উজাড় ।
পুণ্যাত্মা কালেভদ্রে দৈবাৎ আসে,
আমাদের ঠেলায় দৌড় মারে বনে জঙ্গলে গুহায় ।

প্রথম নাগরিক

দড়িটার রং যেন এল নীল হয়ে ।
সামলে কথা কোস ।

মেয়েদের প্রবেশ

প্রথমা

বাজা ভাই, শাঁখ বাজা—

রথ না চললে কিছুই চলবে না ।

চড়বে না হাঁড়ি, বুলবুলিতে খেয়ে যাবে ধান ।

এরই মধ্যে আমার মেজো ছেলের গেছে চাকরি,

তার বউটা শুষছে জ্বরে । কপালে কী আছে জানি নে ।

প্রথম নাগরিক

মেয়েমানুষ, তোমরা এখানে কী করতে ।

কালের রথযাত্রায় কোনো হাত নেই তোমাদের ।

কুটনো কোটোগে ঘরে ।

দ্বিতীয়া

কেন, পূজো দিতে তো পারি ।

আমরা না থাকলে পুরুতের পেট হত না এত মোটা ।

গড় করি তোমায়, দড়ি-নারায়ণ ! প্রসন্ন হও ।

এনেছি তোমার ভোগ । ওলো, চাল্ চাল্ ঘি,

চাল্ ছুধ, গঙ্গাজলের ঘটি কোথায়,

ঢেলে দে-না জল । পঞ্চগব্য রাখ্ ঐখানে,

জ্বালা পঞ্চপ্রদীপ । বাবা দড়ি-নারায়ণ,

এই আমার মানত রইল, তুমি যখন নড়বে

মাথা মুড়িয়ে চুল দেব ফেলে ।

তৃতীয়া

এক মাস ছেড়ে দেব ভাত, খাব শুধু রুটি ।
বলো-না ভাই, সবাই মিলে— জয় দড়ি-নারায়ণের জয় !

প্রথম নাগরিক

কোথাকার মূর্খ তোরা —
দে মহাকালনাথের জয়ধ্বনি ।

প্রথমা

কোথায় তোমাদের মহাকালনাথ । দেখি নে তো চক্ষু ।
দড়ি-প্রভুকে দেখছি প্রত্যক্ষ—
হুম্মান-প্রভুর লঙ্কা-পোড়ানো লেজখানার মতো—
কী মোটা, কী কালো, আহা দেখে চক্ষু সার্থক হল ।
মরণকালে ঐ দড়ি-ধোওয়া জল ছিটিয়ে দিয়ো আমার মাথায় ।

দ্বিতীয়া

গালিয়ে নেব আমার হার, আমার বাজুবন্দ,
দড়ির ডগা দেব সোনা-বাঁধিয়ে ।

তৃতীয়া

আহা, কী সুন্দর রূপ গো !

প্রথমা

যেন যমুনা নদীর ধারা ।

দ্বিতীয়

যেন নাগকন্টার বেণী ।

তৃতীয়

যেন গণেশঠাকুরের শুঁড় চলেছে লম্বা হয়ে,
দেখে জল আসে চোখে ।

সন্ন্যাসীর প্রবেশ

প্রথমা

দড়ি-ঠাকুরের পূজা এনেছি, ঠাকুর ।
কিন্তু পুরুত যে নড়েন না, মস্তুর পড়বে কে ।

সন্ন্যাসী

কী হবে মস্তুরে ।
কালের পথ হয়েছে দুর্গম ।
কোথাও উঁচু, কোথাও নিচু, কোথাও গভীর গর্ত ।
করতে হবে সব সমান, তবে ঘুচবে বিপদ ।

তৃতীয়

বাবা, সাতজন্মে শুনি নি এমন কথা ।
চিরদিনই তো উঁচুর মান রেখেছে নিচু মাথা হেঁট করে ।
উঁচু-নিচুর সাঁকোর উপর দিয়েই তো রথ চলে ।

সন্ন্যাসী

দিনে দিনে গর্তগুলোর হাঁ উঠছে বেড়ে ।

হয়েছে বাড়াবাড়ি, সাঁকো আর টিকছে না ।

ভেঙে পড়ল বলে ।

[শ্রবান

প্রথমা

চল্ ভাই, তবে পূজো দিইগে রাস্তা-ঠাকুরকে ।

আর গর্ত-প্রভুকেও তো সিন্নি দিয়ে করতে হবে খুশি,
কী জানি গুঁরা শাপ দেন যদি । একটি-আধটি তো নন,
আছেন ছ-হাত পাঁচ-হাত অন্তর ।

নমো নমো দড়ি-ভগবান, রাগ কোরো না ঠাকুর,
ঘরে আছে ছেলেপুলে ।

[মেয়েদের শ্রবান

সৈন্তদলের প্রবেশ

প্রথম সৈনিক

ওরে বাস্ রে ! দড়িটা পড়ে আছে পথের মাঝখানে—
যেন একজটা ডাকিনীর জটা ।

দ্বিতীয় সৈনিক

মাথা দিল হেঁট করে ।

স্বয়ং রাজা লাগালেন হাত, আমরাও ছিলুম পিছনে ।
একটু ক্যাচকোঁচও করলে না চাকাটা ।

তৃতীয় সৈনিক

ও যে আমাদের কাজ নয়, তাই ।

ক্ষত্রিয় আমরা, শূদ্র নই, নই গোরু ।
 চিরদিন আমরা চড়েই এসেছি রথে ।
 চিরদিন রথ টানে ঐ ওরা— যাদের নাম করতে নেই ।

প্রথম নাগরিক

শোনো ভাই, আমার কথা ।
 কালের অপমান করেছি আমরা, তাই ঘটেছে এ-সব অনাস্থি ।

তৃতীয় সৈনিক

এ মানুষটা আবার বলে কী ।

প্রথম নাগরিক

ত্রৈতাযুগে শূদ্র নিতে গেল ব্রাহ্মণের মান—
 চাইলে তপস্যা করতে, এত বড়ো আস্থার্দা—
 সেদিনও অকাল লাগল দেশে, অচল হল রথ ।
 দয়াময় রামচন্দ্রের হাতে কাটা গেল তার মাথা,
 তবে তো হল আপদ শাস্তি ।

দ্বিতীয় নাগরিক

সেই শূদ্ররা শাস্ত্র পড়ছেন আজকাল,
 হাত থেকে কাড়তে গেলে বলেন, আমরা কি মানুষ নই ।

তৃতীয় নাগরিক

মানুষ নই ! বটে । কতই গুনব কালে কালে ।
 কোন্‌দিন বলবে, ঢুকব দেবালয়ে ।
 বলবে, ব্রাহ্মণক্ষত্রিয়ের সঙ্গে নাইব এক ঘাটে ।

প্রথম নাগরিক

এর পরেও রথ যে চলছে না, সে আমাদের প্রতি দয়া করে ।
চললে চাকার তলায় গুঁড়িয়ে যেত বিশ্বব্রহ্মাণ্ড ।

প্রথম সৈনিক

আজ্ঞ শূত্র পড়ে শাস্ত্র,
কাল লাঙল ধরবে ব্রাহ্মণ । সর্বনাশ !

দ্বিতীয় সৈনিক

চল-না ওদের পাড়ায় গিয়ে প্রমাণ করে আসি—
ওরাই মানুষ না আমরা ।

দ্বিতীয় নাগরিক

এ দিকে আবার কোন্ বুদ্ধিমান বলেছে রাজাকে—
কলিযুগে না চলে শাস্ত্র, না চলে শস্ত্র,
চলে কেবল স্বর্ণচক্র । তিনি ডাক দিয়েছেন শেঠজিকে ।

প্রথম সৈনিক

রথ যদি চলে বেনের টানে
তবে গলায় অস্ত্র বেঁধে জলে দেব ডুব ।

দ্বিতীয় সৈনিক

দাদা, রাগ কর মিছে, সময় হয়েছে বাঁকা ।
এ যুগে পুষ্পধনুর ছিলেটাও
বেনের টানেই দেয় মিঠে সুরে টঙ্কার ।

তার তীরগুলোর ফলা বেনের ঘরে শানিয়ে না আনলে
ঠিক জায়গায় বাজে না বৃকে ।

তৃতীয় সৈনিক

তা সত্যি । এ কালের রাজছে রাজা থাকেন সামনে,
পিছনে থাকে বেনে । যাকে বলে অর্ধ-বেনে-রাজেশ্বর মূর্তি ।

সন্ন্যাসীর প্রবেশ

প্রথম সৈনিক

এই-যে সন্ন্যাসী, রথ চলে না কেন আমাদের হাতে ।

সন্ন্যাসী

তোমরা দড়িটাকে করেছ জর্জর ।

যেখানে যত তীর ছুঁড়েছ, বিঁধেছে ওর গায়ে ।

ভিতরে ভিতরে ফাঁক হয়ে গেছে, আলগা হয়েছে বাঁধনের জোর ।

তোমরা কেবল ওর ক্ষত বাড়িয়েই চলবে,

বলের মাতলামিতে দুর্বল করবে কালকে ।

সরে যাও, সরে যাও ওর পথ থেকে ।

[প্রস্থান

ধনপতির অহুচরবর্গের প্রবেশ

প্রথম ধনিক

এটা কী গো, এখনি হুঁচট খেয়ে পড়েছিলুম ।

দ্বিতীয় ধনিক

ওটাই তো রথের দড়ি ।

রথের রশি

২৩

চতুর্থ ধনিক

বীভৎস হয়ে উঠেছে, যেন বাসুকি মরে উঠল ফুলে ।

প্রথম সৈনিক

কে এরা সব ।

দ্বিতীয় সৈনিক

আংটির হীরে থেকে আলোর উচ্চিঙেঙুলো

লাফিয়ে লাফিয়ে পড়ছে চোখে ।

প্রথম নাগরিক

ধনপতি শেঠির দল এরা ।

প্রথম ধনিক

আমাদের শেঠজিকে ডেকেছেন রাজা ।

সবাই আশা করছে, তাঁর হাতেই চলবে রথ ।

দ্বিতীয় সৈনিক

সবাই বলতে বোঝায় কাকে বাপু ?

আর তারা আশাই বা করে কিসের ।”

দ্বিতীয় ধনিক

তারা জানে, আজকাল চলছে যা-কিছু

সব ধনপতির হাতেই চলছে ।

প্রথম সৈনিক

সত্যি নাকি ! এখনি দেখিয়ে দিতে পারি,

তলোয়ার চলে আমাদেরই হাতে ।

কালের ষাট্রা

তৃতীয় ধনিক

তোমাদের হাতখানাকে চালাচ্ছে কে ।

প্রথম সৈনিক

চুপ, ছুঁবিনীত !

দ্বিতীয় ধনিক

চুপ করব আমরা বটে !

আজ আমাদেরই আওয়াজ ঘুরপাক খেয়ে বেড়াচ্ছে

জলে স্থলে আকাশে ।

প্রথম সৈনিক

মনে ভাবছ, আমাদের শতগ্নী ভুলেছে তার বজ্রনাদ !

দ্বিতীয় ধনিক

ভুললে চলবে কেন । তাকে যে আমাদেরই ছকুম

ঘোষণা করতে হয় এক হাট থেকে আরেক হাটে

সমুদ্রের ঘাটে ঘাটে ।

প্রথম নাগরিক

ওদের সঙ্গে পারবে না তর্কে ।

প্রথম সৈনিক

কী বল, পারব না !

সবচেয়ে বড়ো তর্কটা ঝন্ঝন্ করে খাপের মধ্যে ।

প্রথম নাগরিক

তোমাদের তলোয়ারগুলোর কোনোটা খায় ওদের নিমক,
কোনোটা খেয়ে বসেছে ওদের ঘুষ।

প্রথম ধনিক

শুনলেম, নর্মদাতীরের বাবাজিকে আনা হয়েছিল
দড়িতে হাত লাগাবার জন্তে। জান খবর ?

দ্বিতীয় ধনিক

জানি বৈকি।

রাজার চর পৌঁছল গুহায়,

তখন প্রভু আছেন চিৎ হয়ে বুকে ছুই পা আটকে।

তুরী ভেরী দামামা জগৎস্পের চোটে ধ্যান যদিবা ভাঙল,
পা-দুখানা তখন আড়ষ্ট কাঠ !

নাগরিক

শ্রীচরণের দোষ কী, দাদা !

পঁয়ষট্টি বছরের মধ্যে একবারও নাম করে নি চলাফেরার।

বাবাজি বললেন কী।

দ্বিতীয় ধনিক

কথা কওয়ার বালাই নেই।

জিবটার চাঞ্চল্যে রাগ ক'রে গোড়াতেই সেটা ফেলেছেন কেটে।

ধনিক

তার পরে ?

দ্বিতীয় ধনিক

তার পরে দশ জোয়ানে মিলে আনলে তাঁকে রথতলায় ।
 দড়িতে যেমনি তাঁর হাত পড়া,
 রথের চাকা বসে যেতে লাগল মাটির নীচে ।

ধনিক

নিজের মনটা যেমন ডুবিয়েছেন
 রথটাকেও তেমনি তলিয়ে দেবার চেষ্টা ।

দ্বিতীয় ধনিক

একদিন উপবাসেই মানুষের পা চায় না চলতে—
 পঁয়ষট্টি বছরের উপবাসের ভার পড়ল চাকার 'পরে ।

মন্ত্রী ও ধনপতির প্রবেশ

ধনপতি

ডাক পড়ল কেন, মন্ত্রীমশায় ?

মন্ত্রী

অনর্থপাত হলেই সর্বাগ্রে তোমাকে স্মরণ করি ।

ধনপতি

অর্থপাতে যার প্রতিকার, আমার দ্বারা তাই সম্ভব ।

মন্ত্রী

মহাকালের রথ চলছে না ।

ধনপতি

এ পর্যন্ত আমরা কেবল চাকায় তেল দিয়েছি,
রশিতে টান দিই নি।

মন্ত্রী

অন্য সব শক্তি আজ অর্থহীন,
তোমাদের অর্থবান হাতের পরীক্ষা হোক।

ধনপতি

চেষ্টা করা যাক।
দৈবক্রমে চেষ্টা যদি সফল হয়, অপরাধ নিয়ো না তবে।

দলের লোকের প্রতি

বলো সিদ্ধিরস্ত্র।

সকলে

সিদ্ধিরস্ত্র।

ধনপতি

লাগো তবে ভাগ্যবানেরা। টান দেও।

ধনিক

রশি তুলতেই পারি নে। বিষম ভারী!

ধনপতি

এসো কোষাধ্যক্ষ, ধরো জুমি কষে।
বলো সিদ্ধিরস্ত্র। টানো, সিদ্ধিরস্ত্র!
টানো, সিদ্ধিরস্ত্র!

দ্বিতীয় ধনিক

মন্ত্রীমশায়, রশিটা যেন আরো আড়ষ্ট হয়ে উঠল,
আর আমাদের হাতে হল যেন পক্ষাঘাত !

সকলে

ছয়ো ছয়ো !

সৈনিক

যাক, আমাদের মানরক্ষা হল ।

পুরোহিত

আমাদের ধর্মরক্ষা হল ।

সৈনিক

যদি থাকত সেকাল, আজ তোমার মাথা যেত কাটা

ধনপতি

ঐ সোজা কাজটাই জান তোমরা ।

মাথা খাটাতে পার না, কাটতেই পার মাথা ।

মন্ত্রীমশায়, ভাবছ কী ।

মন্ত্রী

ভাবছি, সব চেষ্টাই ব্যর্থ হল—

এখন উপায় কী ।

ধনপতি

এবার উপায় বের করবেন স্বয়ং মহাকাল ।

তাঁর নিজের ডাক যেখানে পৌঁছবে

সেখান থেকে বাহন আসবে ছুটে ।

আজ যারা চোখে পড়ে না

কাল তারা দেখা দেবে সবচেয়ে বেশি ।

ওহে খাতাঞ্চি, এইবেলা সামলাওগে খাতাপত্র—

কোষাধ্যক্ষ, সিঙ্কুকগুলো বন্ধ করো শক্ত তালায় ।

[ধনপতি ও তার দলের প্রহান

মেয়েদের প্রবেশ

প্রথম

হাঁ গা, রথ চলল না এখনো, দেশশুদ্ধ রইল উপোস করে ।

কলিকালে ভক্তি নেই যে ।•

মন্ত্রী

তোমাদের ভক্তির অভাব কী বাছা,

দেখি-না তার জোর কত ।

প্রথম

নমো নমো,

নমো নমো বাবা দড়ি-ঠাকুর, অস্ত পাই নে তোমার দয়ার ।

নমো নমো ।

দ্বিতীয়

তিনকড়ির মা বললে, সতেরো বছরের ব্রাহ্মণের মেয়ে—

ঠিকছক্কুর বেলা, বোম-ভোলানাথ বলে

তালপুকুরে— ঘাটের থেকে তিন হাতের মধ্যে—

একডুবে তিন গোছা পাট-শিয়াল তুলে
 ভিজ্জে চুল দিয়ে বেঁধে দড়ি-প্রভুর কাছে পোড়ালে
 প্রভুর টনক নড়বে ! জোঁগাড় করেছি অনেক যত্নে,
 সময়ও হয়েছে পোড়াবার ।
 আগে দড়ি বাবার গায়ে সিঁদুর চন্দন লাগা ।
 ভয় কিসের, ভক্তবৎসল তিনি—
 মনে মনে শ্রীগুরুর নাম করে গায়ে হাত ঠেকালে
 অপরাধ নেবেন না তিনি ।

প্রথম

তুই দে-না ভাই চন্দন লাগিয়ে, আমাকে বলিস কেন ।
 আমার দেওরপো পেটরোগা,
 কী জানি কিসের থেকে কী হয় ।

তৃতীয়া

ঐ তো ধোঁয়া পাকিয়ে পাকিয়ে উঠছে ।
 কিন্তু জাগলেন না তো !
 দয়াময় !
 জয় প্রভু, জয় দড়ি-দয়াল প্রভু, মুখ তুলে চাও ।
 তোমাকে দেব পরিয়ে পঁয়তাল্লিশ ভরির সোনার আংটি—
 গড়াতে দিয়েছি বেণী স্নাকরার কাছে ।

দ্বিতীয়া

তিন বছর থাকব দাসী হয়ে, ভোগ দেব তিন বেলা ।
 ওলো বিনি, পাখাটা এনেছিস তো বাতাস কর-না—

দেখছি সু নে রোদ্দুরে তেতে উঠেছে গুঁর মেঘবরন গা ।
 ঘটি করে গঙ্গাজলটা টেলে দে ।
 ঐখানকার কাদাটা দে তো ভাই আমার কপালে মাখিয়ে ।
 এই তো আমাদের খেঁদি এনেছে খিচুড়ি-ভোগ
 বেলা হয়ে গেল, আহা কত কষ্ট পেলেন প্রভু ।
 জয় দড়ীশ্বর, জয় মহাদড়ীশ্বর, জয় দেবদেবদড়ীশ্বর,
 গড় করি তোমায়, টলুক তোমার মন ।
 মাথা কুটছি তোমার পায়ে, টলুক তোমার মন ।
 পাখা কর্ লো; পাখা কর, জোরে জোরে ।

প্রথমা

কী হবে গো, কী হবে আমাদের—
 দয়া হল না যে! আমার তিন ছেলে বিদেশে,
 তারা ভালোয় ভালোয় ফিরলে হয় ।

চরের প্রবেশ

মন্ত্রী

বাছারা, এখানে তোমাদের কাজ হল—
 এখন ঘরে গিয়ে জপতপ ব্রতনিয়ম করোগে ।
 আমাদের কাজ আমরা করি ।

প্রথমা

যাচ্ছি, কিন্তু দেখো মন্ত্রীবাবা,
 ঐ ধোঁয়াটা যেন শেষপর্যন্ত থাকে—

আর ঐ বিম্বিপত্রটা যেন পড়ে না যায় ।

[মেয়েদের গ্রন্থান

চর

মন্ত্রীমশায়, গোল বেধেছে শূদ্রপাড়ায় ।

মন্ত্রী

কী হল ।

চর

দলে দলে ওরা আসছে ছুটে, বলছে, রথ চালাব আমরা ।

সকলে

বলে কী ! রশি ছুঁতেই পাবে না ।

চর

ঠেকাবে কে তাদের । মারতে মারতে তলোয়ার যাবে ক্ষয়ে ।
মন্ত্রীমশায়, বসে পড়লে যে !

মন্ত্রী

দল বেঁধে আসছে বলে ভয় করি নে—
ভয় হচ্ছে পারবে ওরা ।

সৈনিক

বল কী মন্ত্রীমহারাজ, শিলা জলে ভাসবে ?

মন্ত্রী

নীচের তলাটা হঠাৎ উপরের তলা হয়ে ওঠাকেই বলে প্রলয়,

বরাবর যা' প্রচ্ছন্ন তাই প্রকাশ হবার সময়টাই যুগাস্তর ।

সৈনিক

আদেশ করুন কী করতে হবে, ভয় করি নে আমরা ।

মন্ত্রী

ভয় করতেই হবে, তলোয়ারের বেড়া তুলে বণ্ডা

ঠেকানো যায় না ।

চর

এখন কী আদেশ বলুন ।

মন্ত্রী

বাধা দিয়ো না ওদের ।

বাধা পেলে শক্তি নিজেকে নিজে চিনতে পারে—

চিনতে পারলেই আর ঠেকানো যায় না ।

চর

ঐ-যে এসে পড়েছে ওরা ।

মন্ত্রী

কিছু কোরো না তোমরা, থাকো স্থির হয়ে ।

শূঙ্গলের প্রবেশ

দলপতি

আমরা এলেম বাবার রথ চালাতে ।

মন্ত্রী

তোমরাই তো বাবার রথ চালিয়ে আসছ চিরদিন ।

দলপতি

এতদিন আমরা পড়তেম রথের চাকার তলায়,
দ'লে গিয়ে ধুলোয় যেতুম চ্যাপটা হয়ে ।
এবার সেই বলি তো নিল না বাবা !

মন্ত্রী

তাই তো দেখলেম ।
সকাল থেকে চাকার সামনে ধুলোয় করলে লুটোপুটি—
ভয়ে উপরে তাকালে না, পাছে ঠাকুরের দিকে চোখ পড়ে—
তবু তো চাকার মধ্যে একটুও দেখা গেল না ক্ষুধার লক্ষণ !

পুরোহিত

একেই বলে অগ্নিমান্দ্য,
তেজ ক্ষয় হলেই ঘটে এই দশা ।

দলপতি

এবার তিনি ডাক দিয়েছেন তাঁর রশি ধরতে ।

পুরোহিত

রশি ধরতে ! ভারি বুদ্ধি তোমাদের ! জানলে কী করে ।

দলপতি

কেমন করে জানা গেল সে তো কেউ জানে না ।
ভোরবেলায় উঠেই সবাই বললে সবাইকে,
ডাক দিয়েছেন বাবা । কথাটা ছড়িয়ে গেল পাড়ায় পাড়ায়,

পেরিয়ে গেল মাঠ, পেরিয়ে গেল নদী,
পাহাড় ডিঙিয়ে গেল খবর—
ডাক দিয়েছেন বাবা ।

সৈনিক

রক্ত দেবার জন্তে ।

দলপতি

না, টান দেবার জন্তে ।

পুরোহিত

বরাবর সংসার যারা চালায়, রথের রশি তাদেরই হাতে ।

দলপতি

সংসার কি তোমরাই চালাও ঠাকুর !

পুরোহিত

স্পর্ধা দেখে একবার ! কথার জবাব দিতে শিখেছে—
লাগল ব'লে ব্রহ্মশাপ ।

দলপতি

মন্ত্রীমশায়, তোমরাই কি চালাও সংসার ।

মন্ত্রী

সে কী কথা। সংসার বলতে তো তোমরাই ।

নিজগুণেই চল, তাই রক্ষে ।

চালাক লোকে বলে আমরাই চালাচ্ছি ।

আমরা মান রাখি লোক ভুলিয়ে ।

দলপতি

আমরাই তো জোগাই অন্ন, তাই তোমরা বাঁচ ;
আমরাই বুলি বস্ত্র, তাতেই তোমাদের লজ্জারক্ষা ।

সৈনিক

সর্বনাশ ! এতদিন মাথা হেঁট করে বলে এসেছে ওরা—
তোমরাই আমাদের অন্নবস্ত্রের মালিক ।
আজ ধরেছে উল্টো বুলি, এ তো সহ্য হয় না ।

মন্ত্রী

সৈনিকের প্রতি

চূপ করো !

সর্দার, মহাকালের বাহন তোমরাই,
তোমরা নারায়ণের গরুড় ।

এখন তোমাদের কাজ সাধন করে যাও তোমরা ।
তার পরে আসবে আমাদের কাজের পালা ।

দলপতি

আয় রে ভাই, লাগাই টান, মরি আর বাঁচি ।

মন্ত্রী

কিন্তু বাবা, সাবধানে রাস্তা বাঁচিয়ে চোলো ।
বরাবর যে-রাস্তায় রথ চলেছে, যেয়ো সেই রাস্তা ধরে
পোড়ো না যেন একেবারে আমাদের ঘাড়ের উপর ।

দলপতি

কখনো বড়ো রাস্তায় চলতে পাই নি, তাই রাস্তা চিনি নে।

রথে আছেন যিনি তিনিই সামলাবেন।

আয় ভাই, দেখছিস রথচুড়ায় কেতনটা উঠছে ছলে।

বাবার ইশারা। ভয় নেই আর, ভয় নেই।

ঐ চেয়ে দেখ্ রে ভাই,

মরা নদীতে যেমন বান আসে

দড়ির মধ্যে তেমনি প্রাণ এসে পৌঁছেচে।

পুরোহিত

ছুলো, ছুলো দেখছি, ছুলো শেষে, রশি ছুলো পাষণ্ডেরা!

মেয়েদের ছুটিয়া প্রবেশ

সকলে

ছুয়ো না, ছুয়ো না, দোহাই বাবা —

ও গদাধর, ও বনমালী, এমন মহাপাপ করো না।

পৃথিবী যাবে যে রসাতলে।

আমাদের স্বামী ভাই বোন ছেলে

কাউকে পারব না বাঁচাতে।

চল্ রে চল্, দেখলেও পাপ আছে।

[গ্রহান

পুরোহিত

চোখ বোজো, চোখ বোজো তোমরা।

ভস্ম হয়ে যাবে ক্রুদ্ধ মহাকালের মূর্তি দেখলে।

সৈনিক

একি, একি, চাকার শব্দ নাকি—
না আকাশটা উঠল আর্তনাদ করে ?

পুরোহিত

হতেই পারে না— কিছুতেই হতে পারে না—
কোনো শাস্ত্রেই লেখে না ।

নাগরিক

নড়েছে রে, নড়েছে, ঐ তো চলেছে !

সৈনিক

কী ধুলোই উড়ল— পৃথিবী নিশ্বাস ছাড়ছে ।
অত্মায়, ঘোর অত্মায় ! রথ শেষে চলল যে—
পাপ, মহাপাপ !

শূদ্রদল

জয় জয়, মহাকালনাথের জয় !

পুরোহিত

তাই তো, এও দেখতে হল চোখে !

সৈনিক

ঠাকুর, তুমিই ছকুম করো, ঠেকাব রথ-চলা ।
বৃদ্ধ হয়েছেন মহাকাল, তাঁর বুদ্ধিভ্রংশ হল—
দেখলেম সেটা স্বচক্ষে ।

পুরোহিত

সাহস হয় না ছকুম করতে ।

অবশেষে জাত খোয়াতেই বাবার যদি খেয়াল গেল
এবারকার মতো চূপ করে থাকো, রঞ্জুলাল ।

আসছে বারে ওঁকে হবেই প্রায়শ্চিত্ত করতে ।

হবেই, হবেই, হবেই ।

ওঁর দেহ শোধন করতে গঙ্গা যাবে শুকিয়ে ।

সৈনিক

গঙ্গার দরকার হবে না ।

ঘড়ার ঢাকনার মতো শূঙ্গুলোর মাথা দেব উড়িয়ে,
ঢালব ওদের রক্ত ।

নাগরিক

মন্ত্রীমশায়, যাও কোথায় ।

মন্ত্রী

যাব ওদের সঙ্গে রশি ধরতে ।

সৈনিক

ছি ছি, ওদের হাতে হাত মেলাবে তুমি !

মন্ত্রী

ওরাই যে আজ পেয়েছে কালের প্রসাদ ।

স্পষ্টই গেল দেখা, এ মায়্যা নয়, নয় স্বপ্ন ।

এবার থেকে মান রাখতে হবে ওদেরই সঙ্গে সমান হয়ে ।

সৈনিক

তাই বলে ওদেরই একসারে রশি ধরা !
ঠেকাবই আমরা, রথ চলুক আর নাই চলুক ।

মন্ত্রী

এবার দেখছি চাকার তলায় পড়বার পালা তোমাদেরই ।

সৈনিক

সেও ভালো । অনেককাল চণ্ডালের রক্ত শুষে
চাকা আছে অশুচি,
এবার পাবে শুদ্ধ রক্ত । স্বাদ বদল করুক ।

পুরোহিত

কী হল মন্ত্রী, এ কোন্ শনিগ্রহের ভেলকি ?
রথটা যে এরই মধ্যে নেমে পড়েছে রাজপথে ।
পৃথিবী তবু তো নেমে গেল না রসাতলে ।
মাতাল রথ কোথায় পড়ে কোন্ পল্লীর ঘাড়ে, কে জানে ।

সৈনিক

ঐ দেখো, ধনপতির দল আর্তনাদ করে ডাকছে আমাদের ।
রথটা একেবারে সোজা চলেছে ওদেরই ভাগ্যের মুখে ।
যাই ওদের রক্ষা করতে ।

মন্ত্রী

নিজেদের রক্ষার কথা ভাবো ।

দেখছ না, বুঁকেছে তোমাদের অস্ত্রশালার দিকে ।

সৈনিক

উপায় ?

মন্ত্রী

ওদের সঙ্গে মিলে ধরো-সে রশি ।
বাঁচবার দিকে ফিরিয়ে আনো রথটাকে—
দো-মনা করবার সময় নেই ।

[প্রস্থান

সৈনিক

কী করবে ঠাকুর, তুমি কী করবে ।

পুরোহিত

বীরগণ, তোমরা কী করবে বলো আগে ।

সৈনিক

কী করতে হবে বলো-না ভাইসকল !
সবাই যে একেবারে চুপ করে গেছ !
রশি ধরব, না লড়াই করব ?
ঠাকুর, তুমি কী করবে বলোই-না ।

পুরোহিত

কী জানি, রশি ধরব, না শাস্ত্র আওড়াব ?

সৈনিক

গেল, গেল সব । রথের এমন হাঁক শুনি নি কোনো পুরুষে ।

দ্বিতীয় সৈনিক

চেয়ে দেখ্-না, ওরাই কি টানছে রথ
না রথটা আপনিই চলেছে ওদের ঠেলে নিয়ে ।

তৃতীয় সৈনিক

এতকাল রথটা চলত যেন স্বপ্নে—
আমরা দিতেম টান আর ও পিছে পিছে আসত
দড়িবাঁধা গোরুর মতো ।

আজ চলেছে জেগে উঠে । বাপ্ রে কী তেজ ।
মানছে না আমাদের বাপদাদার পথ—
একটা কাঁচা পথে ছুটেছে বুনো মহিষের মতো ।
পিঠের উপরে চড়ে বসেছে যম ।

দ্বিতীয় সৈনিক

ঐ-যে আসছে কবি, ওকে জিজ্ঞাসা করি ব্যাপারটা কী ।

পুরোহিত

পাগলের মতো কথা বলছ তোমরা ।
আমরাই বুঝলেম না মানে, বুঝবে কবি ?
ওরা তো বানিয়ে বানিয়ে বলে কথা—শাস্ত্র জানে কী ।

কবির প্রবেশ

দ্বিতীয় সৈনিক

এ কী উল্টোপাল্টা ব্যাপার কবি !

পুরুতের হাতে চলল না রথ, রাজার হাতে না—
 মানে বুঝলে কিছু ?

কবি

ওদের মাথা ছিল অত্যন্ত উঁচু,
 মহাকালের রথের চূড়ার দিকেই ছিল ওদের দৃষ্টি—
 নীচের দিকে নামল না চোখ,
 রথের দড়িটাকেই করলে তুচ্ছ ।
 মানুষের সঙ্গে মানুষকে বাঁধে যে-বাঁধন তাকে ওরা মানে নি ।
 রাগী বাঁধন আজ উন্নত হয়ে লেজ আছড়াচ্ছে—
 দেবে ওদের হাড় গুঁড়িয়ে ।

পুরোহিত

তোমার শূদ্রগুলোই কি এত বুদ্ধিমান—
 ওরাই কি দড়ির নিয়ম মেনে চলতে পারবে ।

কবি

পারবে না হয়তো ।
 একদিন ওরা ভাববে, রথী কেউ নেই, রথের সর্বময় কর্তা ওরাই ।
 দেখো, কাল থেকেই শুরু করবে চাঁচাতে—
 জয় আমাদের হাল লাঙল চরকা তাঁতের ।
 তখন এঁরাই হবেন বলরামের চেলা—
 হৃদয়ের মাতলামিতে জগৎটা উঠবে টলমলিয়ে ।

পুরোহিত

তখন যদি রথ আর-একবার অচল হয়
 বোধকরি তোমার মতো কবিরই ডাক পড়বে—
 তিনি ফুঁ দিয়ে ঘোরাবেন চাকা !

কবি

নিতান্ত ঠাট্টা নয়, পুরুতঠাকুর !
 রথযাত্রায় কবির ডাক পড়েছে বারে বারে ।
 কাজের লোকের ভিড় ঠেলে পারে নি সে পৌঁছতে ।

পুরোহিত

রথ তারা চালাবে কিসের জোরে । বুঝিয়ে বলো ।

কবি

গায়ের জোরে নয়, ছন্দের জোরে ।
 আমরা মানি ছন্দ, জানি একঝোঁকা হলেই তাল কাটে
 মরে মানুষ সেই অশুন্দরের হাতে
 চালচলন যার একপাশে বাঁকা ;
 কুস্তকর্ণের মতো গড়ন যার বেমানান,
 যার ভোজন কুৎসিত,
 যার ওজন অপরিমিত ।
 আমরা মানি সুন্দরকে । তোমরা মান কঠোরকে—
 অস্ত্রের কঠোরকে, শাস্ত্রের কঠোরকে ।
 বাইরে ঠেলা-মারার উপর বিশ্বাস,

অস্তরের তালমানের উপর নয় ।

সৈনিক

তুমি তো লম্বা উপদেশ দিয়ে চললে,
ও দিকে যে লাগল আগুন ।

কবি

যুগাবসানে লাগেই তো আগুন ।
যা ছাই হবার তাই ছাই হয়,
যা টিকে যায় তাই নিয়ে সৃষ্টি হয় নবযুগের ।

সৈনিক

তুমি কী করবে, কবি ।

কবি

আমি তাল রেখে রেখে গান গাব ।

সৈনিক

কী হবে তার ফল ।

কবি

যারা টানছে রথ তারা পা ফেলবে তালে তালে ।
পা যখন হয় বেতালা
তখন খুদে খুদে খালখন্দগুলো মারমূর্তি ধরে ।
মাতালের কাছে রাজপথও হয়ে ওঠে বন্ধুর ।

মেয়েদের প্রবেশ

প্রথমা

এ হল কী ঠাকুর !

তোমরা এতদিন আমাদের কী শিখিয়েছিলে ।

দেবতা মানলে না পূজো, ভক্তি হল মিছে ।

মানলে কিনা শুদ্ধুরের টান, মেলেচ্ছের হোঁওয়া !

ছি ছি, কী ঘেন্না ।

কবি

পূজো তোমরা দিলে কোথায় ।

দ্বিতীয়

এই তো এইখানেই ।

যি ঢেলেছি, দুধ ঢেলেছি, ঢেলেছি গঙ্গাজল—

রাস্তা এখনো কাদা হয়ে আছে ।

পাতায় ফুলে ওখানটা গেছে পিছল হয়ে ।

কবি

পূজো পড়েছে ধুলোয়, ভক্তি করেছ মাটি ।

রথের দড়ি কি পড়ে থাকে বাইরে ।

সে থাকে মানুষে মানুষে বাঁধা ; দেহে দেহে প্রাণে প্রাণে ।

সেইখানে জমেছে অপরাধ, বাঁধন হয়েছে দুর্ভল ।

তৃতীয়

আর ওরা— যাদের নাম করতে নেই ?

কবি

ওদের দিকেই ঠাকুর পাশ ফিরলেন—

নইলে ছন্দ মেলে না । একদিকটা উঁচু হয়েছিল অতিশয় বেশি,
ঠাকুর নীচে দাঁড়ালেন ছোটোর দিকে,
সেইখান থেকে মারলেন টান, বড়োটাকে দিলেন কাত করে ।
সমান করে নিলেন তাঁর আসনটা ।

প্রথমা

তার পরে হবে কী ।

কবি

তার পরে কোন্-এক যুগে কোন্-একদিন
আসবে উল্টোরথের পালা ।
তখন আবার নতুন যুগের উঁচুতে নিচুতে হবে বোঝাপড়া ।
এই বেলা থেকে বাঁধনটাতে দাও মন—
রথের দড়িটাকে নাও বুকে তুলে, ধুলোয় ফেলো না ;
রাস্তাটাকে ভক্তিরসে দিয়ো না কাদা করে ।
আজকের মতো বলো সবাই মিলে—
যারা এতদিন মরেছিল তারা উঠুক বেঁচে,
যারা যুগে যুগে ছিল খাটো হয়ে
তারা দাঁড়াক একবার মাথা তুলে ।

সন্ন্যাসীর প্রবেশ

সন্ন্যাসী

জয়, মহাকালনাথের জয় ।

কবির দীক্ষা

আমি তো ভক্তি হয়েছিলেম তোমার দলেই ।

দৌড় দিলে কেন ।

ভয়ে ।

ভয় কিসের ।

ভবভয়নিবারিণী সভার সভাপতি—

আহা, পরম ধার্মিক—

বললেন আমাকে, ঐ লক্ষ্মীছাড়াটা—

থামলে কেন ।

আমি জানি বলেছেন,

লক্ষ্মীছাড়াটা দিচ্ছে তোমাকে রসাতলে ।

একেবারে ঐ শব্দটাই—

রসাতলে ।

অথায় তো বলেন নি ।

বল কী কবি !

জীবন আমার যাঁর সাধনায় মগ্ন
সেই দেবতা তলিয়ে আছেন অতলে —

খুড়ো-জ্যাঠারা বলেছেন সবাই—
তোমার দীক্ষায় না আছে অর্থের আশা,
না আছে পরমার্থের ।

পণ্ডিত মানুষ তোমার খুড়ো-জ্যাঠারা,
বলেন ঠিক কথাই ।

সর্বনাশ তো হবে !

সত্য কথাটি বেরল মুখে—
সর্বনাশ, ঐটের থেকেই সর্বলাভ—
সর্বনেশেই মন কেড়েছে কবির ।

বুঝলেম কথাটা ।

মিলছে তত্ত্বানন্দস্বামীর সঙ্গে ।
শিবমন্ত্র দেন তিনি প্রলয়সাধনায় ।

শিবমন্ত্র দিই আমিও ।

অবাক করলে—

তুমি তো জানি কবি,
কবে হলে শৈব ।

কালিদাস ছিলেন শৈব ।
সেই পথের পথিক কবির ।

কেন বল বেঠিক কথা ।
তোমরা তো মেতে আছ নাচে গানে ।

জগৎজোড়া নাচগানেরই পালা আমাদের প্রভুর ।
কী বলেন তত্ত্বানন্দস্বামী ।

প্রলয় ছাড়া কথা নেই তাঁর মুখে ।
তত্ত্বানন্দস্বামীর নাচ ।
শুনলে গস্তীর গণেশ
বুংহিতধ্বনি করবেন অট্টহাস্তে ।
ত্যাগের দীক্ষা নিয়েছি তাঁর কাছে ।

যদি পরামর্শ দেন সবই ফুঁকে দিতে
তবে কী করবে ত্যাগ ।
উপুড় করবে শূন্য ঘড়াটাকে ?

তুমি কাকে বল ত্যাগ, কবি ।

ত্যাগের রূপ দেখো ঐ ঝরনায়,

নিয়ত গ্রহণ করে তাই নিয়তই করে দান ।
 নিজেকে যে শুকিয়েছে যদি সেই হল ত্যাগী,
 তবে সব-আগে শিব ত্যাগ করুন অন্নপূর্ণাকে ।

কিন্তু সন্ন্যাসী শিব ভিক্ষুক, সেটা তো মান' ।
 মহত্ব দিলেন তিনি জগতের দরিদ্রকে ।

দারিদ্র্যে তাঁরই মহত্ব মহৎ যিনি ঐশ্বর্যে ।
 মহাদেব ভিক্ষা নেন পাবেন বলে নয়—
 আমাদের দানকে করতে চান সার্থক ।

ভরব কেমন করে তাঁর অসীম ভিক্ষার বুলি ।

তিনি না চাইলে খুঁজেই পেতেম না দেবার ধন
 বুঝলেম না কথটা ।

কিছু তিনি চান নি কুকুর-বেড়ালের কাছে ।
 'অন্ন চাই' বলে ডাক দিলেন মানুষের দ্বারে ।
 বেরল মানুষ লাঙল কাঁধে ।
 যে মাটি কাঁকা ছিল, প্রকাশ পেল তাতে অন্ন ।
 বললেন 'চাই কাপড়' ।
 হাত পেতেই রইলেন—
 বেরল ফলের থেকে তুলো,

তুলোর থেকে স্ততো,
 স্ততোর থেকে কাপড় ।
 ভাগ্যে তাঁর ভিক্ষার ঝুলি অসীম
 তাই মানুষ সন্ধান পায় অসীম সম্পদের ।
 নইলে দিন কাটত কুকুর-বেড়ালের মতো ।
 তোমরা কি বল সবচেয়ে বড়ো সন্ন্যাসী ঐ কুকুর-বেড়াল ।
 তত্ত্বানন্দস্বামী কী বলেন ।

তিনি বলেন শিবের ভিক্ষার ঝুলির টানে আমরা হব নিষ্কিঞ্চন ।
 যার কিছু নেই দেবার, তার নেই দেনা ।
 সংসারের নালিশ একেবারে বন্ধ তার নামে ।

মানুষকে যদি দেউলে করেন তিনি,
 তবে ভিক্ষু দেবতার ব্যাবসা হবে যে অচল ।
 তাঁর ভিক্ষের ঝুলির টানে মানুষ হয় ধনী —
 যদি দান করতেন ঘটত সর্বনাশ ।

তোমার কথা শুনে বোধ হচ্ছে, মিথ্যে নয় পুরাণের কথাটা ।
 ভিক্ষুক শিবের বরেই রাবণের স্বর্ণলঙ্কা ।
 কিন্তু আগুন কেন লাগে সে লঙ্কায় ।

সে যে করলে ভিক্ষে বন্ধ । লাগল জমাতে ।
 দিতে যেমনি পারলে না, যেমনি লাগল কাড়তে,

অমনি ঘটল সর্বনাশ ।

ভিক্ষু দেবতা দ্বারে বসে হাঁকেন, দেহি দেহি ।

তবু আমরা কোণে বসে আছি নেংটি পরে । দেব' কীই বা !

কেউ বা লোভে পড়ে ভাঙতে চায় না জমানো ধন ।

তবে কি যুরোপখণ্ডকে বলবে শিবের চেলা ।

বলতে হয় বৈকি !

নইলে এত উন্নতি কেন ।

মেনেছে ওরা মহাভিক্ষুর দাবি ।

তাই বের করে আনছে নব নব সম্পদ—

ধনে প্রাণে জ্ঞানে মানে ।

অশাস্তিও তো কম দেখছি নে ওদের মধ্যে ।

যখন শিবের ভোগ ভেঙে নিজের দিকে চুরি করে

উৎপাত বাধে তখন অশিবের ।

ত্যাগের ধনে মানুষ ধনী, চুরির ধনে নয় ।

আমরা কুঁড়ে, ভিক্ষুক দেবতাকে দিই নে কিছু ।

তাই মরছি সবদিকেই—

খেতে ফসল যায় মরে,

পুকুরে জল যায় শুকিয়ে,

দেহে ধরে রোগ, মনে ধরে অবসাদ,

বিদেশী রাজা দেয় ছুই কান মলে ।

শিবের ঝুলি ভরবে যেদিন, সেদিন আমাদের সব ভরবে ।

কিন্তু গোড়ায় বলছিলে যে-রসের কথাটা
 শিবের ঝুলিতে তো তার খবর মেলে না ।
 মেলে বৈকি । গাছের ত্যাগ ফল দিয়ে ।
 ফল ফলে না রস না হলে ।
 প্রাণের ধনই হল আনন্দ, যাকে বলি রস ।
 যেখানে রসের দৈন্ত, ভরে না সেখানে প্রাণের কমণ্ডলু ।
 শ্মশানে কেন দেখি তোমার ঐ দেবতাকে ।
 মৃত্যুতে তাঁর বিলাস বলে নয়, মৃত্যুকে জয় করবেন বলে ।
 যে দেবতারা অমরাবতীতে
 দ্বন্দ্বই নেই তাঁদের মৃত্যুর সঙ্গে ।
 মানুষের যিনি শিব
 তিনি বিষ পান করেন বিষকে কাটাবেন বলে ।
 ‘ভিক্ষা দাও, ভিক্ষা দাও’ দ্বারে দ্বারে রব উঠল তাঁর কণ্ঠে—
 সে মুষ্টিভিক্ষা নয়, নয় অবজ্ঞার ভিক্ষা ।
 নির্ঝরিত্রীর শ্রোত যখন হয় অলস
 তখন তার দানে পঙ্ক হয় প্রধান ।
 দুর্বল আত্মার তামসিক দানে
 দেবতার তৃতীয় নেত্রে আগুন ওঠে জ্বলে ।

পরি শিষ্ট

রথযাত্রা

আমার মেহাস্পদ ছাত্র শ্রীমান প্রমথনাথ বিসির কোনো রচনা হইতে এই নাট্যদৃশ্যের
ভাবটি আমার মনে আসিয়াছিল

১ নাগরিক

মহাকালের রথযাত্রায় এবার যে রথ অচল হয়ে রইল। কিছুতেই
নড়লেন না। কার দোষে হল তা জানি, গণংকার গুনে বলে
দিয়েছেন।

২ নাগরিক

হয়তো কারো দোষ নেই, হয়তো মহাকাল ক্লান্ত, আর চলতে
রাজি নন।

১ নাগরিক

আরে বল কী। চলতে রাজি না হলে আমাদের চলবে কী
করে। ঐ দেখো-না, রথের দড়িটা পড়ে আছে, কত যুগের
দড়ি— কত মানুষের হাত পড়েছে ঐ দড়িতে, এমন করে তো
কোনোদিন ধুলোয় পড়ে থাকে নি।

৩ নাগরিক

রথ যদি না চলে, আর ঐ দড়ি যদি পড়ে থাকে, তা হলে ও যে
সমস্ত রাজ্যের গলায় দড়ি হবে।

৪ নাগরিক

বাবা রে, ঐ দড়িটা দেখে ভয় লাগছে, মনে হচ্ছে ও যেন ক্রমে ক্রমে সাপ হয়ে ফণা ধরে উঠবে।

৩ নাগরিক

দেখ-না ভাই, একটু একটু যেন নড়ছে মনে হচ্ছে।

১ নাগরিক

আমরা যদি না নড়াতে পারি, ও যদি আপনি নড়ে ওঠে, তা হলে যে সর্বনাশ হবে।

৩ নাগরিক

তা হলে জগতের সব জোড়গুলো বিজোড় হয়ে উঠবে রে। তা হলে রথটা চলবে আমাদের বৃকের পাঁজরের উপর দিয়ে। আমরা ওকে নিজে চালাই বলেই তো ওর চাকার তলায় পড়ি নে। এখন উপায় ?

১ নাগরিক

ঐ দেখ-না, পুরুতঠাকুর বসে মন্ত্র পড়ছে।

২ নাগরিক

রথযাত্রায় সব আগেই ঐ পুরুতঠাকুরের দলরাই তো দড়ি ধরে প্রথম টানটা দিয়ে থাকেন। এবার কি শুধু মন্ত্র পড়েই কাজ সারবেন নাকি।

৪ নাগরিক

চেষ্টার ত্রুটি হয় নি। ভোরের বেলা সেই অন্ধকার থাকতে সবার আগে ওঁরাই তো একচোট টানাটানি করে নিয়েছেন। কলিযুগে ওঁদের কি আর তেজ আছে রে।

৩ নাগরিক

ঐ দেখ, আমার কেমন মনে হচ্ছে ঐ রশিটা যেন যুগ-যুগান্তরের নাড়ীর মতো দব্দব্দ করছে।

১ নাগরিক

আমার মনে হচ্ছে ঐ রথ চলবে কোনো এক পুণ্যাত্মা মহাপুরুষের স্পর্শ পেলে।

২ নাগরিক

আরে, রথ চালাতে পুণ্যাত্মা মহাপুরুষের জন্তে বসে থাকলে শুভলগ্নও তো বসে থাকবে না। ততক্ষণ আমাদের মতো পাপাত্মাদের দশা হবে কী।

১ নাগরিক

পাপাত্মাদের দশা কী হবে সেজন্তে ভগবানের মাথাব্যথা নেই।

২ নাগরিক

বলিস কী রে। পুণ্যাত্মার জন্তে এ জগৎ তৈরি হয় নি। তা হলে যে আমরা অতিষ্ঠ হতুম। সৃষ্টিটা আমাদেরই জন্তে। দৈবাৎ ছুটো-একটা পুণ্যাত্মা দেখা দেয়, বেশিক্ষণ টিকতে পারে

না— আমাদের ঠেলা খেয়ে বনে জঙ্গলে গুহায় তাদের আশ্রয় নিতে হয় ।

১ নাগরিক

তা হলে তুমিই দড়াটা ধরে টান দাও-না দাদা— দেখা যাক রথ এগোয় না দড়াটা ছেঁড়ে, না তুমিই পড় মুখ খুবড়ে ।

২ নাগরিক

দাদা, আমাদের সঙ্গে পুণ্যাত্মাদের তফাতটা এই যে, গুণ্ঠিতে তারা একটা-ছোটো, আমরা অনেক । যদি ভরসা করে সেই অনেকে মিলে টান দিতে পারি রথ চলবেই । মিলতে পারলেম না ব'লে টানতে পারলেম না, পুণ্যাত্মাদের জগ্রে শূণ্ঠের দিকে তাকিয়ে রইলেম ।

৪ নাগরিক

ওরে ভাই, দড়িটা মনে হল যেন নড়ে উঠল, কথাবার্তা সামলে বলিস রে ।

১ নাগরিক

শাস্ত্রে আছে ব্রাহ্মমুহুর্তে রথের প্রথম টানটা পুরোহিতের হাতে, দ্বিতীয় প্রহরে দ্বিতীয় টানটা রাজার— সেও তো হয়ে গেল, রথ এগোল না— এখন তৃতীয় টানটা কার হাতে পড়বে ।

সৈন্যদের প্রবেশ

১ সৈন্য

বড়ো লজ্জা দিলে রে ! স্বয়ং রাজা হাত লাগালে, সঙ্গে সঙ্গে

আমরা হাজার জনে ধরে টান দিলুম, চাকার একটু ক্যাচকোঁচ শব্দও হল না।

২ সৈন্য

আমরা ক্ষত্রিয়, আমরা তো শূজের মতো গোরু নই— রথ টানা আমাদের কাজ নয়, আমাদের কাজ রথে চড়া।

২ সৈনিক

কিন্ধা রথ ভাঙা। ইচ্ছে করছে কুড়ুলখানা নিয়ে রথটাকে টুকরো টুকরো করে ফেলি। দেখি মহাকাল কেমন ঠেকাতে পারেন।

১ নাগরিক

দাদা, তোমাদের অস্ত্রের জোরে রথ চলবেও না, রথ ভাঙবেও না। গণৎকার কী গুনে বলেছে তা শোন নি বুঝি ?

১ সৈনিক

কী বল তো।

১ নাগরিক

ত্রৈতাযুগে একবার যে কাণ্ড ঘটেছিল, এখন তাই ঘটবে।

১ সৈনিক

আরে, ত্রৈতাযুগে তো লঙ্কাকাণ্ড ঘটেছিল।

১ নাগরিক

সে নয়, সে নয়।

২ সৈনিক

কিঙ্কিন্দ্রাক্যাকাণ্ড ?

১ নাগরিক

তারই কাছাকাছি। সেই-যে শূদ্র তপস্শা করতে গিয়েছিল, মহাকাল তাতেই তো সেদিন ক্ষেপে উঠেছিলেন। তার পর রামচন্দ্র শূদ্রের মাথা কেটে তবে বাবাকে শাস্ত করেছিলেন।

৩ সৈনিক

আজ তো সে ভয় নেই, আজ ব্রাহ্মণই তপস্শা ছেড়ে দিয়েছে, শূদ্রের তো কথাই নেই।

১ নাগরিক

এখনকার শূদ্রেরা কেউ কেউ লুকিয়ে লুকিয়ে শাস্ত্র পড়তে আরম্ভ করেছে। ধরা পড়লে বলে, আমরা কি মানুষ নই। স্বয়ং কলিযুগ শূদ্রের কানে মন্ত্র দিতে বসেছে যে তারা মানুষ। রথ যে চলে না তাতে মহাকালের দোষ কী— না চললেই ভালো। যদি চলতে শুরু করে তা হলে চন্দ্রসূর্য গুঁড়িয়ে ফেলবে। শূদ্র চোখ রাঙিয়ে বলে কিনা ‘আমরা কি মানুষ নই’! কালে কালে কতই গুনব।

১ সৈনিক

আজ শূদ্র পড়ছে শাস্ত্র, কাল ব্রাহ্মণ ধরবে লাঙল! সর্বনাশ!

২ সৈনিক

তা হলে চল, ওদের পাড়ায় গিয়ে একবার কবে হাত চালানো যাক। ওরা মানুষ না আমরা মানুষ, প্রত্যক্ষ দেখিয়ে দিই।

২ নাগরিক

রাজাকে কে গিয়ে বলেছে, কলিযুগে শাস্ত্রও চলে না, অস্ত্রও চলে না, একমাত্র চলে স্বর্ণমুদ্রা। রাজা তাই আমাদের ধনপতি শেঠজিকে তলব করেছেন। ধনপতি টান দিলেই রথ চলবে এইরকম সকলের বিশ্বাস।

১ সৈনিক

বেনের টানে যদি রথ চলে তা হলে আমরা অস্ত্র গলায় বেঁধে জলে ডুবে মরব।

২ সৈনিক

তা, রাগ করলে চলবে কেন। বেনের টান আজকাল সব জায়গাতেই লেগেছে। এমন-কি, পুষ্পধনুর ছিলেটা বেনের টানেই চঞ্চল হয়ে ওঠে। তার তীরগুলো বেনের ঘরেই তৈরি।

৩ সৈনিক

তা সত্যি, আজকাল আমাদের রাজস্বে রাজা থাকেন সামনে, কিন্তু পিছনে থাকে বেনে।

১ সৈনিক

পিছনেই থাকে তো থাক্-না— আমরা তো থাকি ডাইনে-বঁয়ে, মান তো আমাদেরই।

৩ সৈনিক

পাশে যে থাকে তার মান থাকতে পারে, কিন্তু পিছনে যে থাকে ঠেলাটা যে তারই।

ধনপতির অনুচরদের প্রবেশ

১ সৈনিক

এরা সব কে ।

২ সৈনিক

আংটির হীরে থেকে আলোর উচ্চিংড়েগুলো চোখের উপর লাফ দিয়ে পড়ছে ।

৩ সৈনিক

গলায় সোনার হার নয়তো, সোনার শিকল বললেই হয় । কে এরা ।

১ নাগরিক

এরাই তো আমাদের ধনপতি শেঠীর দল । ঐ সোনার শিকল দিয়ে এরা মহাকালকে বেঁধে ফেলেছে বলেই তাঁর রথ চলছে না ।

১ সৈনিক

তোমরা কি করতে এসেছ ।

১ ধনিক

রাজা আমাদের প্রভু ধনপতিকে ডেকে পাঠিয়েছেন। কারো হাতে রথ চলছে না, তাঁর হাতে চলবে বলেই সবাই আশা করে আছে ।

২ সৈনিক

সবাই বলতে কে রে বাপু ? আর আশাই বা করে কেন ।

২ ধনিক

আজকাল যা-কিছু চলছে সবই যে ধনপতির হাতে চলছে ।

১ সৈনিক

এখনই দেখিয়ে দিতে পারি তলোয়ার তার হাতে চলে না,
আমাদের হাতে চলে ।

৩ ধনিক

তোমাদের হাত চালাচ্ছে কে সেটা বুঝি এখনো খবর পাও নি ।

১ সৈনিক

চুপ বেয়াদব !

২ ধনিক

আমরা চুপ করব ? আজ আমাদেরই আওয়াজ জলে স্থলে
আকাশে তা জান ?

১ সৈনিক

তোমাদের আওয়াজ ? আমাদের শতঙ্গী যখন বজ্রনাদ করে
ওঠে—

২ ধনিক

তোমাদের শতঙ্গী বজ্রনাদে আমাদেরই কথা এক ঘাট থেকে
আর-এক ঘাটে, এক হাট থেকে আর-এক হাটে ঘোষণা
করবার জগ্গে আছে ।

১ নাগরিক

দাদা, ওদের সঙ্গে ঝগড়া করে পেরে উঠবে না ।

১ সৈনিক

কী বল ? পারব না !

১ নাগরিক

না, তোমাদের কোনো তলোয়ার ওদের নিমক খেয়েছে, কোনোটা বা ওদের ঘুষ খেয়েছে, খাপ থেকে বের করতে গেলেই তা বুঝতে পারবে।

১ ধনিক

শুনেছিলেম রথের দড়িতে হাত দেবার জন্তে নর্মদাতীরের বাবাজিকে আজ আনা হয়েছিল। কী হল খবর জান ?

২ ধনিক

জানি বৈকি। যখন এরা গুহায় গিয়ে পৌঁছল, দেখল, প্রভু পদ্মাসনে দুই পা আটকে চিত হয়ে পড়ে আছেন। সাড়াশব্দ নেই। বহুকষ্টে ধ্যান ভাঙানো হল। কিন্তু পা দুখানা আড়ষ্ট কাঠ হয়ে গেছে, চলে না।

১ নাগরিক

শ্রীচরণের দোষ কী। তারা আজ ৬৫ বছরের মধ্যে একবারও চলার নাম করে নি। তা, বাবাজি বললেন কী ?

২ ধনিক

বলা-কওয়ার বালাই নেই। চাঞ্চল্যের অপবাদ দিয়ে জিবটাকে একেবারে কেটেই ফেলেছেন। গোঁ গোঁ করতে লাগলেন, তার থেকে যার যে-রকম খেয়াল সে সেই রকমেরই অর্থ করে নিলে।

১ ধনিক

তার পরে ?

২ ধনিক

তার পর ধরাধরি করে বাবাজিকে রথতলা পর্যন্ত আনা গেল। কিন্তু যেমনি দড়ি ধরলেন রথের চাকা মাটির মধ্যে বসে যেতে লাগল।

১ ধনিক

হা, হা, বাবাজি নিজের মনটাকে যেমন গভীরে ডুবিয়েছেন, মহাকালের রথটাকে স্নান তেমনি তলিয়ে দিচ্ছিলেন বুঝি ?

২ ধনিক

ওঁর পঁয়ষট্টি বৎসরের উপবাসের ভারে চাকা বসে গেল। একদিনের উপবাসের ধাক্কাতেই আমাদের পা চলতে চায় না।

১ নাগরিক

উপবাসের ভারের কথা বলছ, তোমাদের অহংকারের ভারটা বড়ো কম নয়।

২ নাগরিক

সে ভার আপনাকেই আপনি চূর্ণ করে। দেখব আজ তোমাদের ধনপতির মাথা কেমন হেঁট না হয়।

১ ধনিক

আচ্ছা দেখো। বাবা মহাকালের ভোগ জোগায় কে। সে তো আমাদের ধনপতি। যদি বন্ধ করে দেয় তা হলে তাঁর যে

চলা না-চলা ছুই সমান হয়ে উঠবে। পেট চলা হল সব চলার
মূলে।

মন্ত্রী ও ধনপতির প্রবেশ

ধনপতি

মন্ত্রীমশায়, আজ আমাকে ডাক পড়ল কেন।

মন্ত্রী

রাজ্যে যখনি কোনো অনর্থপাত হয় তখনি তো তোমাকেই
সর্বাগ্রে ডাক পড়ে।

ধনপতি

অর্থপাতে যার প্রতিকার সম্ভব আমার দ্বারা তার ক্রটি হয় না।
কিন্তু আজকের সংকটটা কী রকমের।

মন্ত্রী

শুনেছ বোধ হয়, মহাকালের রথ আজ কারো হাতের টানেই
চলছে না।

ধনপতি

শুনেছি। কিন্তু মন্ত্রী এ-সব কাজ তো এতদিন—

মন্ত্রী

জানি, এতদিন আমাদের পুরোহিত ঠাকুররাই এ-সব কাজ
চালিয়েছেন। কিন্তু তখন যে এঁরা স্বাধীন সাধনার জোরে নিজে
চলতেন, চালাতেও পারতেন। এখন এঁরা তোমাদেরই দ্বারে
অচল হয়ে বাঁধা, এখন এঁদের হাতে কিছুই চলবে না।

ধনপতি

অগ্ন অগ্ন বারে রাজা সেনাপতি রাজপারিষদ সকলেই রথের রশিতে হাত লাগাতেন, কখনো তো বাধা ঘটে নি। তখন আমরা তো কেবল চাকায় তেল জুগিয়ে এসেছি, রশিতে টান দিই নি তো।

মন্ত্রী

দেখো শেঠজি, রথযাত্রাটা আমাদের একটা পরীক্ষা। কাদের শক্তিতে সংসারটা সত্যিই চলছে বাবা মহাকালের রথচক্র ঘোরার দ্বারা সেইটেরই প্রমাণ হয়ে থাকে। যখন পুরোহিত ছিলেন নেতা তখন তাঁরা রশি ধরতে না-ধরতে রথটা ঘুমভাঙা সিংহের মতো ধড়ফড় করে নড়ে উঠত। এবারে যে কিছুতেই সাড়া দিল না। তার থেকে প্রমাণ হচ্ছে শাস্ত্রই বলো, শাস্ত্রই বলো, সমস্ত অর্থহীন হয়ে পড়েছে— অর্থ এখন তোমারই হাতে। সেই তোমার সার্থক হাতটি আজ রথের রশিতে লাগাতে হবে।

ধনপতি

আগে বরঞ্চ আমার দলের লোকে চেষ্টা করে দেখুক, যদি একটুখানি কেঁপেও ওঠে আমিও হাত দেব, নইলে সকল লোকের সামনে—

মন্ত্রী

কেন আর দেরি করা শেঠজি। রাজ্যের সমস্ত লোক উপোস করে আছে, রথ মন্দিরে গিয়ে না পৌঁছলে কেউ জলগ্রহণ করবে

না। তোমার চেষ্টাতেও যদি রথ না চলে লজ্জা কিসের, স্বয়ং পুরোহিত রাজা সকলেরই চেষ্টা ব্যর্থ হল, দেশসুদ্ধ লোক তো তা দেখেছে।

ধনপতি

তঁারা হলেন লোকপাল, আমরা হলুম পালের লোক; জনসাধারণে তাঁদের বিচার করে এক রকমে, আমাদের বিচার করে আর-এক রকমে। রথ যদি না চলে আমার লজ্জা আছে, কিন্তু রথ যদি চলে তা হলে আমার ভয়। তা হলে আমার সেই শুভাদৃষ্টের স্পর্ধা কোনো লোক ক্ষমা করতে পারবেই না। তখন কাল থেকে তোমরাই ভাবতে বসবে আমাকে খর্ব করা যায় কী উপায়ে।

মন্ত্রী

যা বলছ সবই সত্য হতে পারে, কিন্তু তবুও রথ চলা চাই। আর বেশিক্ষণ যদি দ্বিধা কর তা হলে দেশের লোক খেপে যাবে।

ধনপতি

আচ্ছা, তবে চেষ্টা করে দেখি। কিন্তু যদি দৈবক্রমে আমার চেষ্টা সফল হয় তা হলে আমার অপরাধ নিয়ো না। (দলের লোকদের প্রতি) বলো, সিদ্ধিরস্ত !

সকলে

সিদ্ধিরস্ত !

ধনপতি

বলো, জয় সিদ্ধিদেবী !

সকলে

জয় সিদ্ধিদেবী !

ধনপতি

টানব কী ! এ রশি যে তুলতেই পারি নে । মহাকালের রথও যেমন ভারী, রশিও তেমনি, এ ভার বহন কি সহজ লোকের কর্ম । (দলের লোকের প্রতি) এসো, তোমরাও সবাই এসো । সকলে মিলে হাত লাগাও । আমার খাতাঞ্চি কোথায় গেল । এস, এস । এস কোষাধ্যক্ষ ! আবার বলো, সিদ্ধিরস্ত্র— টানো । সিদ্ধিরস্ত্র, আর-এক টান । সিদ্ধিরস্ত্র— জ্বোরে ! নাঃ, কিছুই হল না । আমাদের হাতে রশিটা ক্রমেই যেন আড়ষ্ট হয়ে উঠছে ।

সকলে

হুয়ো ! হুয়ো !

১ সৈনিক

যাক । আমাদের মান রক্ষা হল ।

ধনপতি

নমস্কার, মহাকাল । তুমি আমার সহায়, তাই তুমি স্থির হয়ে রইলে । আমার হাতে যদি তুমি টলতে, আমারই ঘাড়ের উপরে টলে পড়তে, একেবারে পিষে যেতুম ।

ধাতাঞ্চি

প্রভু, এই যুগে আমাদের যে সম্মান সমাদর ক্রমেই বেড়ে উঠছিল সেটার বড়ো ক্ষতি হল।

ধনপতি

দেখো, এতকাল আমরা মহাকালের রথের ছায়ায় দাঁড়িয়ে লোকচক্ষুর অগোচরে বড়ো হয়েছি। আজ রথের সামনে এসে পড়ে আমাদের সংকট ঘটেছে— আশেপাশে লোকের দাঁত-কিড়মিড় অনেক দিন থেকে শুনছি। এখন যদি স্পষ্ট সবাই দেখতে পায় যে, রশি ধরে আমরাই রথ চালাচ্ছি তা হলে আমাদের উপর এমন দৃষ্টি লাগবে যে বেশিক্ষণ টিকব না।

১ সৈনিক

যদি সকাল থাকত তা হলে তোমার হাতে রথ চলল না বলে তোমার মাথা কাটা যেত।

ধনপতি

অর্থাৎ, তোমরা তা হলে হাতে কাজ পেতে। মাথা কাটতে না পেলেই তোমরা বেকার।

১ সৈনিক

আজ কেউ তোমাদের গায়ে হাত দিতে সাহস করে না ; রাজাও না। এতে বাবা মহাকালেরই মান খর্ব হয়ে গেছে।

ধনপতি

সত্যি কথা বলি— যখন সবাই গায়ে হাত দিতে সাহস করত

তখন ঢের বেশি নিরাপদে ছিলুম। আজ সবাই যে আমাদের মানতে বাধ্য হয়েছে এরই মধ্যে আমাদের মরণ। মন্ত্রীমশায়, চুপ করে দাঁড়িয়ে ভাবছ কী।

মন্ত্রী

ভাবছি সব-রকম চেষ্টাই ব্যর্থ হল, এখন কোনো উপায় তো আর বাকি নেই।

ধনপতি

ভাবনা কী। যখন তোমাদের কোনো উপায় খাটল না তখন মহাকাল নিজের উপায় নিজেই বের করবেন। তাঁর চলবার গরজ তাঁরই, আমাদের নয়; তাঁর ডাক পড়লেই যেখান থেকে হোক তাঁর বাহন ছুটে আসবে। আজ যাদের দেখাই যাচ্ছে না, কাল তারা সবচেয়ে বেশি চোখে পড়বে। তার আগে আমার খাতাপত্র সামলাই গে। এসো হে কোষাধ্যক্ষ, আজ সিঁহুকগুলো একটু শক্ত করে বন্ধ করতে হবে।

[ধনপতি ও তার দলের প্রস্থান]

চরের প্রবেশ

চর

মন্ত্রীমশায়, আমাদের শূঁড়পাড়ায় ভারি গোল বেধে গেছে।

মন্ত্রী

কেন কী হয়েছে।

চর

দলে দলে আসছে সব ছুটে। তারা বলে, বাবার রথ আমরা
চালাব।

সকলে

বলে কী। রশি ছুঁতেই দেব না।

চর

কিন্তু তাদের ঠেকাবে কে।

সৈন্যদল

আমরা আছি।

চর

তোমরা কজনই বা আছ। তাদের মারতে মারতে তোমাদের
তলোয়ার ক্ষয়ে যাবে— তবু এত বাকি থাকবে যে রথতলায়
তোমাদের আর জায়গাই হবে না।

চর

মন্ত্রীমশায়, তুমি যে একেবারে বসে পড়লে ?

মন্ত্রী

ওরা দল বেঁধে আসছে বলে আমি ভয় করি নে।

চর

তবে ?

মন্ত্রী

আমার মনে ভয় হচ্ছে ওরা পারবে।

সৈনিক দল

বল কী, মন্ত্রী মহারাজ, ওরা পারবে মহাকালের রথ টানতে !
শিলা জলে ভাসবে !

মন্ত্রী

দৈবাৎ যদি পারে তা হলে বিধাতার নূতন বিধি শুরু হবে।
নীচের তলাটা হঠাৎ উপরের তলা হয়ে ওঠাকেই বলে প্রলয়।
ভূমিকম্পে মাটির মধ্যে সেই চেঁচাতেই তো বিভীষিকা। যা
বরাবর প্রচ্ছন্ন আছে তাই প্রকাশ হবার সময়টাই যুগান্তরের
সময়।

সৈনিক দল

কী করতে চান, আমাদের কী করতে বলেন হুকুম করুন।
আমরা কিছুই ভয় করি নে।

মন্ত্রী

সাহস দেখাতে গিয়েই সংসারে ভয় বাড়িয়ে তোলা হয়।
গৌয়ার্তমি ক'রে তলোয়ারের বেড়া তুলে দিয়েই মহাকালের বণ্ণা
ঠেকানো যায় না।

চর

তা, কী করতে হবে বলেন।

মন্ত্রী

ওদের কোনো বাধা না দেওয়াই হচ্ছে সংপরামর্শ। বাধা দিলে
শক্তি আপনাকে আপনি চিনতে পারে। সেই চিনতে দিলেই
আর রক্ষে নেই।

সৈনিক দল

তা হলে আমরা দাঁড়িয়ে থাকি ? ওরা আশুক ?

চর

ঐ-যে এসে পড়েছে।

মন্ত্রী

তোমরা কিছু করো না। স্থির হয়ে থাকো।

শূত্রদলের প্রবেশ

মন্ত্রী

(দলপতির প্রতি) এই যে সর্দার ! তোমাদের দেখে বড়ো খুশি হলুম।

দলপতি

মন্ত্রীমশায়, আমরা বাবার রথ চালাতে এসেছি।

মন্ত্রী

চিরদিন তোমরাই তো বাবার রথ চালিয়ে এসেছ, আমরা তো উপলক্ষ-মাত্র। সে কি আর জানি নে।

দলপতি

এতদিন আমরা রথের চাকার তলায় পড়েছি, আমাদের দলে দিয়ে রথ চলে গেছে। এবার তো আমাদের বলি বাবা নিল না।

মন্ত্রী

সে তো দেখতে পাচ্ছি। আজ ভোরবেলায় তোমাদের পঞ্চাশজন

চাকার সামনে খুলোয় লুটোপুটি করলে— তবু চাকার মধ্যে একটুও ক্ষুধার লক্ষণ দেখা গেল না, নড়ল না, কঁয়া কঁা করে চীৎকার করে উঠল না— তাদের স্তব্ধতা দেখেই তো ভয় পেয়েছি।

দলপতি

এবারে রথের তলাটাতে পড়বার জন্তে মহাকাল আমাদের ডাক দেন নি— তিনি ডেকেছেন তাঁর রথের রশিটাকে টান নিতে।

পুরোহিত

সত্যি নাকি। কেমন করে জানলে।

দলপতি

কেমন করে জানা যায় সে তো কেউ জানে না। কিন্তু আজ ভোরবেলা থেকেই আমাদের মধ্যে হঠাৎ এই কথা দিয়ে কানাকানি পড়ে গেছে। ছেলেমেয়ে বুড়ো জোয়ান সবাই বলছে ‘বাবা ডেকেছেন’।

সৈনিক

রক্ত দেবার জন্তে।

দলপতি

না, টান দেবার জন্তে।

পুরোহিত

দেখো বাবা, ভালো করে ভেবে দেখো, সমস্ত সংসার যারা চালায় মহাকালের রথের রশির জিন্মে তাদেরই পুরে।

দলপতি

ঠাকুর, সংসার কি তোমরাই চালাও।

পুরোহিত

তা দেখো, কাল খারাপ বটে, তবু হাজার হোক আমরা তো
ব্রাহ্মণ বটে।

দলপতি

মন্ত্রীমশায়, সংসার কি তোমরাই চালাও।

মন্ত্রী

সংসার বলতে তো তোমরাই। নিজগুণে চল, আমরা চালাক
লোকেরা বলে থাকি আমরাই চালাচ্ছি। তোমাদের বাদ দিলে
আমরা কজনই বা আছি।

দলপতি

আমাদের বাদ দিলে তোমরা যে কজনই থাকো-না, থাকবে কী
উপায়ে ?

মন্ত্রী

হাঁ, হাঁ, সে তো ঠিক কথা।

দলপতি

আমরাই তো জোগাচ্ছি অন্ন, তাই খেয়ে তোমরা বেঁচে আছ।
আমরাই বুনছি বস্ত্র, তাতেই তোমাদের লজ্জারক্ষা।

সৈনিক

সর্বনাশ। এতদিন এরা আমাদেরই কাছে হাত জোড় করে বলে

আসছিল 'তোমরাই আমাদের অন্তবস্ত্রের মালিক'। আজ এ
কী রকমের সব উল্টো বুলি। আর তো সহ্য হয় না।

মন্ত্রী

(সৈনিকের প্রতি) চুপ করো। (দলপতিকে) সর্দার, আমরা
তো তোমাদের জন্তেই অপেক্ষা করছিলুম। মহাকালের বাহন
তোমরাই, সে কথা আমরা বুঝি নে, আমরা কি এত মূঢ়।
তোমাদের কাজটা তোমরা সাধন করে দিয়ে যাও, তার পরে
আমাদের কাজ করবার অবসর আমরা পাব।

দলপতি

আয় রে ভাই, সবাই মিলে টান দে। মরি আর বাঁচি আজ
মহাকালের রথ নড়াবই।

মন্ত্রী

কিন্তু সাবধানে রাস্তা বাঁচিয়ে চোলো। যে রাস্তায় বরাবর রথ
চলেছে সেই রাস্তায়। আমাদের ঘাড়ের উপর এসে না পড়ে
যেন।

দলপতি

রথের 'পরে রথী আছেন, রাস্তা তিনিই ঠাউরে নেবেন, আমরা
তো বাহন, আমরা কী বা বুঝি। আয় রে সবাই। ঐ দেখছিস
রথের চূড়ায় কেতনটা ছলে উঠেছে, স্বয়ং বাবার ইশারা। ভয়
নেই, আয় সবাই।

কালের যাত্রা

পুরোহিত

ছুলে রে ছুলে ! রশি ছুলে ! ছি, ছি !

নাগরিকগণ

হায়, হায়, কী সর্বনাশ !

পুরোহিত

চোখ বোজ্ রে তোরা সব, সবাই চোখ বোজ্ ! ক্রুদ্ধ মহাকালের
মূর্তি দেখলে তোরা ভস্ম হয়ে যাবি ।

সৈনিক

ও কী ও ! এ কি চাকারই শব্দ না কী ? না আকাশ আর্তনাদ
করে উঠল ?

পুরোহিত

হতেই পারে না ।

নাগরিক

ঐ তো নড়ল যেন ।

সৈনিক

ধুলো উড়েছে যে । অন্ডায়, ঘোর অন্ডায় ! রথ চলেছে ! পাপ !
মহাপাপ !

, শূদ্রদল

জয়, জয় মহাকালের জয় !

পুরোহিত

তাই তো, এ কী কাণ্ড হল ।

সৈনিক

ঠাকুর, হুকুম করো। আমাদের সমস্ত অস্ত্রশস্ত্র নিয়ে এই অপবিত্র
রথ চলা বন্ধ করে দিই।

পুরোহিত

হুকুম করতে তো সাহস হয় না। বাবা স্বয়ং যদি ইচ্ছে ক'রে
জাত খোয়ান, আমাদের হুকুমে তার প্রায়শ্চিত্ত হবে না।

সৈনিক

তা হলে ফেলে দিই আমাদের অস্ত্র!

পুরোহিত

আর আমিও ফেলে দিই আমার পুঁথিপত্র!

নাগরিকগণ

আমরা যাই সব নগর ছেড়ে! মন্ত্রীমশায়, তুমি কী করবে।
কোথায় যাচ্ছ।

মন্ত্রী

আমি যাচ্ছি ওদের সঙ্গে মিলে রশি ধরতে।

সৈনিক

ওদের সঙ্গে মিলবে?

মন্ত্রী

তা হলেই বাবা প্রসন্ন হবেন। স্পষ্ট দেখছি ওরা যে আজ তাঁর
প্রসাদ পেয়েছে। এ তো স্বপ্ন নয়, মায়া নয়। ওদের থেকে
পিছিয়ে পড়ে আজ কেউ মান রক্ষা করতে পারবে না, মান ওদের
সঙ্গে থেকে।

সৈনিক

কিন্তু তাই ব'লে ওদের সঙ্গে সার মিলিয়ে রশি ধরা! ঠেকাবই
ওদের। দলবল ডাকতে চললুম। মহাকালের রথের পথ রক্তে
কাদা হয়ে যাবে।

পুরোহিত

আমিও তোমাদের সঙ্গে যাব, মন্ত্রণা দেবার কাজে লাগতে
পারব।

মন্ত্রী

ঠেকাতে পারবে না। এবার দেখছি চাকার তলায় তোমাদেরই
পড়তে হবে।

সৈনিক

তাই সই। বাবার রথের চাকা এতদিন যত-সব চণ্ডালের মাংস
খেয়ে অশুচি হয়ে আছে। আজ শুদ্ধ মাংস পাবে।

পুরোহিত

ঐ দেখো, ঐ দেখো মন্ত্রী! এরই মধ্যে রথটা রাজপথ থেকে নেমে
পড়েছে। কোথায় কোন্ পল্লীর উপরে পড়বে কিছুই বলা যায়
না।

সৈনিক

ঐ-যে ধনপতির দল ওখান থেকে চীৎকার করে আমাদের
ডাকছে। রথটা যেন ওদেরই ভাঙার লক্ষ্য করে চলেছে। ওরা
ভয় পেয়ে গেছে। চলো চলো, ওদের রক্ষা করি গে।

মন্ত্রী

নিজেদের রক্ষা করো, তার পরে অশ্ব কথা । আমার তো মনে
হচ্ছে রথটা ঠিক তোমাদের অস্ত্রশালার দিকে ঝুঁকেছে, ওর আর
কিছু চিহ্ন বাকি থাকবে না । ঐ দেখো ।

সৈনিক

উপায় ?

মন্ত্রী

ওদের সঙ্গে মিলে রশি ধরো-সে— তা হলে রক্ষা পাবার পথে
রথের বেগটাকে ফিরিয়ে আনা সম্ভব হবে । আর দ্বিধা করবার
সময় নেই ।

[গ্রহান

সৈনিক

(পরস্পর) কী করবে । ঠাকুর, তুমি কী করবে ।

পুরোহিত

বীরগণ, তোমরা কী করবে ।

সৈনিক

জানি নে, রশি ধরব না লড়াই করব ! ঠাকুর, তুমি কী করবে ।

পুরোহিত

জানি নে, রশি ধরব না আবার শাস্ত্র আওড়াতে বসব !

১ সৈনিক

শুনতে পাচ্ছ— ছড়মুড় শব্দে পৃথিবীটা যেন ভেঙেচুরে পড়ছে ।

২ সৈনিক

চেয়ে দেখো, ওরা টানছে বলে মনেই হচ্ছে না। রথটাই ওদের ঠেলে নিয়ে চলেছে।

৩ সৈনিক

পুরুতঠাকুর, দেখছ রথটা যেন বেঁচে উঠেছে। কী রকম হেঁকে চলেছে। এতবার রথযাত্রা দেখেছি, ওঁর এ-রকম সজীবমূর্তি কখনো দেখি নি। এতকাল ঘুমিয়ে ঘুমিয়ে চলেছিল, আজ জেগে চলেছে। তাই আমাদের পথ মানছে না, নিজের পথ বানিয়ে নিচ্ছে।

২ সৈনিক

কিন্তু গেল যে সব। রথযাত্রার এমন সর্বনেশে উৎসব তো কোনো-দিন দেখি নি। ঐ যে কবি আসছে, ওকে জিজ্ঞাসা করো-না, এ-সবের মানে কী।

পুরোহিত

আমরাই বুঝতে পারলুম না, কবি বুঝতে পারবে? ওরা তো কেবল বানিয়ে কথা বলে, সনাতন শাস্ত্রের কথা জানেই না।

১ সৈনিক

শাস্ত্রের কথাগুলো কোন্‌কালে মরে গেছে ঠাকুর! তাই তোমাদের কথা তো আর খাটে না দেখি। ওদের যে সব তাজা কথা, তাই শুনলে বিশ্বাস হয়।

কবির প্রবেশ

২ সৈনিক

কবি, আজ রথযাত্রায় এই যে-সব উল্টো-পালটা কাণ্ড হয়ে
গেল কেন বুঝতে পারো ?

কবি

পারি বৈকি ।

১ সৈনিক

পুরুতের হাতে, রাজার হাতে রথ চলল না, এর মানে কী ।

কবি

ওরা ভুলে গিয়েছিল মহাকালের শুধু রথকে মানলেই হল না,
মহাকালের রথের দড়িকেও মানা চাই ।

১ সৈনিক

কবি, তোমার কথা শুনে হঠাৎ মনে হয়, হয়তো বা একটা
মানে আছে । খুঁজতে গেলে পাওয়া যায় না ।

কবি

ওরা বাঁধন মানতে চায় নি, শুধু চলাকেই মেনেছিল । তাই
রাগী বাঁধনটা উন্মত্ত হয়ে ওদের উপর লেজ আছড়াচ্ছে, গুঁড়িয়ে
যাবে ।

পুরোহিত

আর তোমার শ্রদ্ধগুলোই কি এত বুদ্ধিমান যে দড়ির নিয়ম
সামলে চলতে পারবে ।

কবি

হয়তো পারবে না। একদিন ভাববে ওরাই রথের কর্তা, তখনই মরবার সময় আসবে। দেখো-না, কালই বলতে শুরু করবে, আমাদেরই হাল লাঙল চরকা তাঁতের জয়। যে বিধাতা মানুষের বুদ্ধিবিছা নিজের হাতে গড়েছেন, অন্তরে বাহিরে অমৃতরস ঢেলে দিয়েছেন, তাঁকে গাল পাড়তে বসবে। তখন এঁরাই হয়ে উঠবেন বলরামের চেলা, হলধরের মাতলামিতে জগৎটা লগুভগু হয়ে যাবে।

পুরোহিত

তখন আবার রথ অচল হলে বোধ করি কবিদের ডাক পড়বে।

কবি

ঠাট্টা নয় পুরুতঠাকুর। মহাকাল বারেবারেই রথযাত্রায় কবিদের ডেকেছেন। তারা কাজের লোকের ভিড় ঠেলে পৌঁছতে পারে নি।

পুরোহিত

তারা চালাবে কিসের জোরে।

কবি

গায়ের জোরে নয়ই। আমরা মানি ছন্দ, আমরা জানি এক-ঝোঁকা হলেই তাল কাটে। আমরা জানি সুন্দরকে কর্ণধার করলেই শক্তির তরী সত্যি বশ মানে। তোমরা বিশ্বাস কর কঠোরকে— শাস্ত্রের কঠোর বা অস্ত্রের কঠোর— সেটা হল ভীরুর বিশ্বাস, দুর্বলের বিশ্বাস, অসাদের বিশ্বাস।

সৈনিক

ওহে কবি, তুমি তো উপদেশ দিতে বসলে, ও দিকে যে আগুন
লাগল।

কবি

যুগে যুগে কতবার কত আগুন লেগেছে। যা থাকবার তা
থাকবেই।

সৈনিক

তুমি কী করবে।

কবি

আমি গান গাব, 'ভয় নেই।'

সৈনিক

তাতে হবে কী।

কবি

যারা রথ টানছে তারা চলবার ভাল পাবে। বেতাল টানটাই
ভয়ংকর।

সৈনিক

আমরা কী করব।

পুরোহিত

আমি কী করব।

কবি

তাড়াতাড়ি কিছু করতেই হবে এমন কথা নেই। দেখো, ভাবো।
ভিতরে ভিতরে নতুন হয়ে ওঠো। তার পরে ডাক পড়বার জগে
তৈরি হয়ে থাকো।

গ্রন্থপরিচয়

‘কালের যাত্রা’ বাংলা ১৩৩৯ সালের [১৯৩২] ভাদ্র মাসে গ্রন্থাকারে প্রকাশিত হয়। ইহা রবীন্দ্র-রচনাবলী ষাটবিংশ খণ্ডের অন্তর্ভুক্ত আছে।

বর্তমান সংস্করণের পরিশিষ্ট অংশে সংকলিত ‘রথযাত্রা’ নাটিকা ১৩৩০ সালের অগ্রহায়ণ-সংখ্যা প্রবাসীতে (পৃ. ২১৬-২২৫) প্রথম প্রকাশিত হয়। ‘রথের রশি’ তাহারই পরিবর্তিত ও আগাগোড়া-পূর্নালিখিত রূপ। রবীন্দ্র-রচনাবলী ষাটবিংশ খণ্ডে রথযাত্রা পরিশিষ্ট রূপে মুদ্রিত আছে।

‘কবির দীক্ষা’র পূর্বপাঠ ১৩৩৫ সালের বৈশাখ-সংখ্যা ‘মাসিক বসুমতী’ পত্রিকায় (পৃ. ২-৪) ‘শিবের ভিক্ষা’ নামে প্রথম মুদ্রিত হইয়াছিল।

শরৎচন্দ্র চট্টোপাধ্যায়ের সপ্তপঞ্চাশত্তম জন্মোৎসব-উপলক্ষে [ভাদ্র ১৩৩৯] লিখিত রবীন্দ্রনাথের একটি পত্রের প্রাসঙ্গিক অংশ নিয়ে উদ্ধৃত হইল—

তোমার ‘জন্মদিন উপলক্ষে ‘কালের যাত্রা’—নামক একটি নাটিকা তোমার নামে উৎসর্গ করেছি। আশা করি, আমার এ দান তোমার অযোগ্য হয় নি। বিষয়টি এই— রথযাত্রার উৎসবে নরনারী সবাই হঠাৎ দেখতে পেলো মহাকালের রথ অচল। মানবসমাজের সকলের চেয়ে বড়ো দুর্গতি, কালের এ গতিহীনতা। মালুবে মালুবে যে সঙ্কট-বন্ধন দেশে দেশে যুগে যুগে প্রসারিত, সেই বন্ধনই এই রথ টানবার রশি। সেই বন্ধনে অনেক গ্রন্থি পড়ে গিয়ে মানবসঙ্কট অসত্য ও অসমান হয়ে গেছে, তাই চলছে না রথ। এই সঙ্কটের অসত্য এতকাল যাদের বিশেষভাবে পীড়িত করেছে, অবমানিত করেছে, মনুষ্যত্বের খ্রেষ্ঠ অধিকার

থেকে বঞ্চিত করেছে, আজ মহাকাল তাদেরই আহ্বান করেছেন তাঁর রথের বাহনরূপে ; তাদের অসম্মান ঘুচলে তবেই সম্বন্ধের অসাম্য দূর হয়ে রথ সম্মুখের দিকে চলবে ।

কালের রথযাত্রার বাধা দূর করবার মহামন্ত্র তোমার প্রবল লেখনীর মুখে সার্থক হোক, এই আশীর্বাদ-সহ তোমার দীর্ঘজীবন কামনা করি ।

—বিচিত্রা । কার্তিক ১৩৩৯ । পৃ. ৪২২

প্রকাশক রণজিৎ রায়
বিশ্বভারতী । ৫ ষারকানাথ ঠাকুর লেন । কলিকাতা ৭

মুদ্রক শ্রীশ্রীনাথরায়ণ ভট্টাচার্য
তাপসী প্রেস । ৩০ বিধান সরণী । কলিকাতা ৬



मूल्य २.०० टाका